

Einkunnir skulu síðan færðar á prófskýrslur eða í prófbók, og ber prófdómara að staðfesta með undirskrift sinni, að einkunnir séu rétt innfærðar.

3. Þegar um er að ræða próf, sem eigi eru samræmd á viðkomandi skólastigi, heldur samin á vegum skólans, ber prófdómara, áður en próf er lagt fyrir nemendur, að athuga prófverkefnið og samþykkja það.
4. Greiðslur til prófdómara fyrir störf þeirra skulu fara eftir gjaldskrá, sem menntamálaráðuneytið setur. Gjaldskráin miðast við tegund og gerð prófa, og skal ákveðinn verkefnafjöldi reiknaður í tímaeiningum.

Reglur þessar gilda fyrst um sinn þar til öðruvísi kynni að verða ákveðið.

*Í menntamálaráðuneytinu, 7. mars 1975.*

**Vilhjálmur Hjálmarsson.**

*Birgir Thorlacius.*

17. mars 1975.

Nr. 62.

## REGLUGERÐ

um orlof kennara og skólastjóra samkvæmt lögum nr. 63/1974, um grunnskóla.

### 1. gr.

#### Um orlofsumsókn.

Umsókn um orlof skal vera á eyðublaði, sem menntamálaráðuneytið lætur gera. Umsókn um orlof á næsta skólaári sendist ráðuneytinu fyrir 1. nóvember. Í umsókn skal taka fram eftirfarandi:

- a) Tilgreina skal menntastofnun og námsgrein eða námsgreinar þegar um er að ræða reglulegt nám. Sé um að ræða námsferð, þá á hvers vegum ferðin er farin, hvert fara skuli og í hvaða tilgangi.
- b) Hvort umsækjandi hefur sótt um eða fengið styrk til fararinnar frá öðrum en menntamálaráðuneytinu.
- c) Hvort umsækjandi hefur áður fengið orlof eða styrk frá menntamálaráðuneytinu eða fyrir milligöngu þess.
- d) Hvort umsækjandi hefur áður sótt um orlof, en ekki fengið.
- e) Aðrar upplýsingar, sem umsækjandi telur skipta máli.

### 2. gr.

#### Skilyrði fyrir veitingu orlofs.

Umsækjandi, sem æskir orlofs, skal fullnægja eftirfarandi skilyrðum og skuldbindingum:

- a) Hafa gegnt kennaraembætti í 10 ár samtals, miðað við fullt starf, settur eða skipaður, til að fá orlof allt að einu ári með föstum embættislaunum.
- b) Hafa gegnt kennaraembætti í 5 ár samtals miðað við fullt starf, settur eða skipaður, til að fá 2—4 mánaða orlof með föstum embættislaunum.
- c) Sá sem gegnir eða hefur gegnt sem settur eða skipaður hlutastöðu, þá eigi minna en hálfu starfi, þann árafjölda sem tilskilinn er í a- og b-liðum (10 ár og 5 ár), á rétt á að sækja um orlof. Ef orlof er veitt verða launin á orlofstímanum í hlutfalli við starfstímalengd, annars vegar miðað við fullt starf í 10 ár (a-liður), hins vegar miðað við fullt starf í 5 ár (b-liður).
- d) Umsækjandi skuldbindur sig til að starfa að skólamálum eða kennslu á vegum ríkisins a. m. k. þrjú ár að orlofi loknu.
- e) Innan 6 mánaða frá því að orlofi lauk skal orlofsþegi senda menntamálaráðu-

neytinu skýrslu um störf sín og nám á orlofstímanum. Skýrslan skal miðuð við að unnt sé að birta hana síðar, og hefur ráðuneytið til þess fulla heimild. Enginn getur fengið á starfsævi sinni hærri fjárhæð í orlof en nemur tveggja ára embættislaunum.

### 3. gr.

#### Afgreiðsla umsókna.

Stefnt skal að því að afgreiðsla orlofsumsóknna vegna næsta skólaárs fari fram fyrir lok janúarmánaðar ár hvert.

### 4. gr.

#### Orlof í sérstöku skyni.

Menntamálaráðuneytið getur auglýst eftir umsækjendum til að leggja fyrir sig sérstakt, tiltekið nám, gegn veitingu orlofs og/eða styrkja.

Umsækjendur um slík orlof og/eða styrki skulu fullnægja þeim skilyrðum, sem tilgreind eru í 2. gr., liðum b—e.

### 5. gr.

#### Um styrki veitta af orlofsfé.

- a) Af fé því, sem veitt er í fjárlögum hverju sinni til orlofs kennara og skólastjóra, er ráðuneytinu heimilt að veita styrki þeim, sem orlof hafa fengið, sbr. 40. gr. laga nr. 63/1974, um grunnskóla, 3. mgr. Umsóknir um slíka styrki skulu hafa borist ráðuneytinu fyrir 15. mars, og skal þar greina ástæður fyrir umsókninni, t. d. kostnað vegna ferðalaga, skólagjöld, húsnæðiskostnað o. fl. Menntamálaráðuneytið lýkur afgreiðslu þeirra styrkumsókna fyrir 15. apríl.
- b) Menntamálaráðuneytið getur eitt sér eða í samráði við aðra aðila efnt til allt að 3ja vikna námsferða með hópum kennara á þeim árstíma, sem skólar starfa ekki, og veitt til þess styrk af orlofsfjárveitingu, sem nemur allt að  $\frac{2}{3}$  af áætluðum ferða- og dvalarkostnaði þeirra kennara, sem þátt taka í slíkum ferðum, enda fullnægi þeir þeim skilyrðum, sem greind eru í 2. gr., lið b.

### 6. gr.

#### Um missi orlofsfjár eða endurgreiðslu.

- a) Vanræki orlofsþegi að skila skýrslu um nám sitt og starf á orlofstímanum, sbr. 2. gr., e-lið og/eða að orlofi hafi ekki verið varið eins og lög og reglugerð mæla fyrir um, getur það varðað launamissi fyrir orlofstímabilið, svo og endurgreiðslu styrkja. Ef menntamálaráðuneytið ákveður að endurheimta laun og/eða styrk orlofsþega, skal krafa um það gerð innan  $1\frac{1}{2}$  árs frá lokum orlofstímabils.
- b) Nú hættir orlofsþegi störfum að kennslu eða öðrum skólamálum áður en 3 ár eru liðin frá lokum orlofs og án þess að knýjandi ástæður séu fyrir hendi og getur þá menntamálaráðuneytið krafist endurgreiðslu á orlofslaunum og/eða styrkjum í hlutfalli við, hve lengi orlofsþeginn hefur starfað að orlofi loknu. Áður en ákvæði þessu er beitt, leitar ráðuneytið eftir rökstuddri greinargerð orlofsþega um ástæður fyrir því að hann hætti störfum og einnig skal leita umsagnar nefndar þeirrar, er starfar samkvæmt 8. gr. þessarar reglugerðar. Réttur ráðuneytisins til endurheimtu fyrnist á einu ári frá því að ráðuneytinu var tilkynnt um brottför úr starfi.

### 7. gr.

#### Um skiptingu orlofs.

- a) Þegar sá sem fengið hefur tveggja til fjögurra mánaða orlof samkvæmt 2. gr., a-lið, hefur náð 10 ára starfsaldri, getur hann aftur sótt um orlof þannig að orlof hans verði þá eitt ár, ef ráðuneytið verður við umsókn hans.

- b) Sá, sem starfað hefur í 10 ár og fengið orlof samkv. 2. gr., a-lið, getur tvískipt því orlofi sínu.
- c) Nú skiptir orlofsþegi orlofi sínu og skal þá orlofs- og/eða styrkfjárhæð reiknuð sem hlutfall af árslaunum eins og þau eru, þegar hvor hluti orlofs er tekinn.

### 8. gr.

#### Um úthlutun orlofs og styrkja.

Fimm manna nefnd, sem menntamálaráðuneytið skipar, geri tillögur til ráðuneytisins um úthlutun orlofs og styrkja. Nefndin skal þannig skipuð: Tveir skipaðir af ráðuneytinu án tilnefningar og skal annar jafnframt vera formaður nefndarinnar, þrír skulu skipaðir samkvæmt tilnefningu Sambands íslenskra barnakennara, Landssambands framhaldsskólakennara og Félags háskólamenntaðra kennara. Skipunartímabil nefndarinnar er 4 ár. Nefndin skal m. a. taka tillit til eftirfarandi atriða:

- a) Hvers konar nám umsækjendur hyggjast stunda og hversu það muni nýtast viðkomandi stofnun eða skólakerfinu í heild.
- b) Hvort umsækjandi hafi áður lagt fram fullgilda orlofsumsókn, en ekki fengið eða getað notað sér orlofið.

Að öðru jöfnu skal sá ganga fyrir, sem áður hefur sótt.

- c) Nefndin metur í hverju einstöku tilfelli, hvort starfsaldur skuli ráða röð annars jafngilda umsókna.
- d) Að öllum jafnaði skal ekki veita orlof samtímis tveim eða fleiri starfsmönnum sömu stofnunar.
- e) Nú sækja hjón, sem bæði fullnægja orlofsskilyrðum, um orlof samtímis samkvæmt 2. gr., a, b og c-liðum. Má þá veita báðum orlof, enda meti ráðuneytið gild rökin fyrir því að bæði hljóti orlof samtímis. Ákvæði d-liðar hér á undan skulu ekki taka til hjóna.

### 9. gr.

#### Yfirlitsskýrsla um orlofsveitingar.

Að loknu hverju orlofsári gerir menntamálaráðuneytið skýrslu um orlofsveitingar, og skulu þar m. a. koma fram eftirfarandi upplýsingar um orlofsþega.

- a) Nafn, starfsaldur við kennslu og vinnustaður.
- b) Lengd orlofs.
- c) Áður fengið orlof.
- d) Hvar og hvernig orlofinu var varið.
- e) Tölulegar upplýsingar um heildarfjárveitingu til orlofs og styrkja, svo og fjöldi orlofsumsókna á orlofsárinu.

### 10. gr.

Reglugerð þessi, sem sett er samkvæmt heimild í 40. gr., sbr. 87. gr., laga nr. 63/1974, um grunnskóla, öðlast þegar gildi.

Skal um veiting orlofs fyrir skólaárið 1975/76 farið eftir ákvæðum reglugerðarinnar svo sem við getur átt.

*Í menntamálaráðuneytinu, 17. mars 1975.*

**Vilhjálmur Hjálmarsson.**

*Birgir Thorlacius.*